

Broj:02-05-6482-2/13
Sarajevo, 21.03.2013. godine

Na osnovu čl. 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj: 24/03 - Prečišćeni tekst), Vlada Kantona Sarajevo, na **16.** sjednici održanoj **21.03.2013.** godine, donijela je sljedeći

ZAKLJUČAK

1. Utvrđuje se Prijedlog zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom.
2. Predlaže se Skupštini Kantona Sarajevo da, u skladu sa članom 159. Poslovnika Skupštine Kantona Sarajevo, („Službene novine Kantona Sarajevo“, br. 41/12 - Drugi novi prečišćeni tekst) u hitnom postupku donese Zakon iz tačke 1. ovog Zaključka.

P R E M I J E R

Suad Zeljković

Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Ministarstvo za rad, socijalnu politiku, raseljena lica i izbjeglice
5. Evidencija
6. A r h i v a



B o s n a i H e r c e g o v i n a
Federacija Bosne i Hercegovine
KANTON SARAJEVO
Ministarstvo za rad, socijalnu politiku,
raseljena lica i izbjeglice

PRIJEDLOG

Z A K O N
O IZMJENAMA I DOPUNAMA ZAKONA O SOCIJALNOJ ZAŠTITI,
ZAŠTITI CIVILNIH ŽRTAVA RATA I ZAŠTITI PORODICE SA DJECOM
(Hitni postupak)

Sarajevo, mart 2013. godine

Na osnovu člana 13. stav 1. tačka e) i člana 18. tačka b) Ustava Kantona Sarajevo (“Službene novine Kantona Sarajevo”, br. 1/96, 2/96-ispravka, 3/96 – ispravka, 16/97, 14/00, 4/01, 28/04 i 6/13) i člana 8. Zakona o osnovama socijalne zaštite, zaštite civilnih žrtava rata i zaštite porodice sa djecom (“Službene novine Federacije Bosne i Hercegovine”, br. 36/99, 54/04, 39/06 i 14/09), Skupština Kantona Sarajevo, na sjednici održanoj _____ godine, **donijela je**

PRIJEDLOG

ZAKON
O IZMJENAMA I DOPUNAMA ZAKONA O SOCIJALNOJ ZAŠTITI,
ZAŠTITI CIVILNIH ŽRTAVA RATA I ZAŠTITI PORODICE SA DJECOM

Član 1.

U Zakonu o socijalnoj zaštiti, zaštiti civilnih žrtava rata i zaštiti porodice sa djecom („Službenenovine Kantona Sarajevo“, br. 16/02, 8/03, 2/06, 21/06, 17/10 i 26/12) u članu 1. iza alineje 5. dodaje se nova alineja 6. koja glasi:

„- uvjeti za imenovanje i razrješenje direktora, predsjednika i članova upravnog odbora, predsjednika i članova nadzornog odbora,“

Dosadašnje alineje 6., 7. i 8. postaju alineje 7., 8. i 9.

Član 2.

Član 16. mijenja se i glasi:

„Član 16.

Osobama i porodicama koje se nalaze u stanju socijalne potrebe osigurava se stambeno zbrinjavanje u skladu sa raspoloživim sredstvima u Budžetu Kantona Sarajevo na poziciji Kantonalnog ministarstva predviđenim za tu namjenu i stambenim jedinicama za tu namjenu kojima raspolaže Kantonalno ministarstvo.

Uredbom Vlade Kantona Sarajevo bliže će se definisati ko se smatra osobom i porodicom u stanju socijalne potrebe u smislu stava 1. ovog člana, način i kriteriji u skladu sa kojima će se istim osigurati stambeno zbrinjavanje.“

Član 3.

U članu 58. iza stava 3. dodaje se novi stav 4. koji glasi:

„Kantonalno ministarstvo donijeće pravilnik kojim će se definisati kriteriji za utvrđivanje visine učešća srodnika u troškovima smještaja u ustanovi.“

Član 4.

U članu 86., brišu se st. 3., 4. i 5.

Član 5.

Član 98a. mijenja se i glasi:

„Član 98a.

Skraćeni naziv Kantonalne javne ustanove „Disciplinski centar za maloljetnike“ je KJU Disciplinski centar.

Djelatnost KJU Disciplinski centar je izvršavanje odgojne mjere – disciplinske mjere upućivanja u disciplinski centar za maloljetnike izrečene maloljetnom učiniocu krivičnog djela, na način propisan zakonom kojim se reguliše izricanje i izvršenje ove disciplinske mjere i to:

- na određeni broj sati tokom dana praznika, ali najviše četiri uzastopna dana praznika;
- na određeni broj sati tokom dana, ali najduže u trajanju od jednog mjeseca;
- na neprekidni boravak tokom određenog broja dana, ali ne duže od dvadeset dana.

KJU Disciplinski centar po naredbi suda može provoditi odluku o privremenom smještaju maloljetnika u toku pripremnog postupka.

KJU Disciplinski centar organizuje djelatnost Dijagnostičko – opservacionog centra namjenjenog za identifikaciju, utvrđivanje i procjenu etiologije, stepena i intenziteta prisutnih poremećaja i ponašanja kod djece oba spola, koja su upućena na dijagnostičku obradu od strane suda, tužilaštva ili nadležne službe socijalne zaštite s ciljem predlaganja odgovarajuće mjere, te daljeg adekvatnog stručnog tretmana.

KJU Disciplinski centar može organizovati projekte, programe i druge aktivnosti prevencije koje su u funkciji smanjenja maloljetničkog kriminaliteta na području Kantona Sarajevo.

U okviru KJU Disciplinski centar će se formirati nova organizaciona jedinica, fizički odvojena od drugih organizacionih jedinica ove ustanove, koja će obavljati poslove vezano za zbrinjavanje djece do 18. godina starosti koja se nalaze u riziku, dok se ne steknu uvjeti za osnivanje posebne ustanove u kojoj će se obavljati ovi poslovi.

Centar kao organ starateljstva, radi zaštite najboljeg interesa djeteta, a na prijedlog Stručnog tima, rješenjem može odlučiti o njegovom smještaju u organizacionu jedinicu iz stava 6. ovog člana i bez pristanka roditelja, koje može trajati najduže dva mjeseca.

Žalba na rješenje iz stava 7. ovog člana ne odlaže izvršenje rješenja i izjavljuje se Kantonalnom ministarstvu.

Organizaciona jedinica iz stava 6. ovog člana može vršiti poslove dnevnog zbrinjavanja djece na dobrovoljnoj osnovi.

Troškovi zbrinjavanja i smještaja djece u organizacionoj jedinici iz stava 6. ovog člana osiguravaju se iz Budžeta Kantona Sarajevo na poziciji Kantonalnog ministarstva predviđenom

za tu namjenu, budžeta općina, donacija, legata, poklona i drugih izvora prihoda u skladu sa propisima.“

Član 6.

Iza podnaslova 11. i člana 112. dodaje se novi podnaslov 12. i čl. 112a., 112b., 112c. i 112d. koji glase:

„12. Uvjeti za imenovanje i razrješenje direktora, predsjednika i članova upravnog odbora, predsjednika i članova nadzornog odbora

Član 112a.

Za direktora ustanove može biti imenovana osoba koja ispunjava slijedeće uvjete: da je državljanin Bosne i Hercegovine,

- da ima završen VII stepen stručne spreme, odnosno završen najmanje prvi ciklus bolonjskog studija visokog obrazovanja u trajanju od najmanje četiri studijske godine sa akademskom titulom i stručnim zvanjem Bakalaureat/Bachelor (240 ECTS bodova),
- da ima najmanje pet godina radnog staža,
- da ima opštu zdravstvena sposobnost,
- da nije osuđivan za krivično djelo koje je nespojivo sa obavljanjem dužnosti direktora,
- da nije osuđivan za prekršaj koji je nespojiv sa obavljanjem dužnosti direktora.

Pravilima ustanove će se urediti bliži uvjeti za imenovanje direktora koji se odnose na vrstu stručne spreme, te eventualno druge uvjete za koje se procijeni da su od značaja za vršenje poslova direktora.

Direktor ustanove ne može biti predsjednik i član upravnog odbora i predsjednik i član nadzornog odbora bilo koje ustanove nezavisno od oblasti za koju je ustanova osnovana a koja djeluje u Bosni i Hercegovini.

Procedura izbora i imenovanja direktora ustanove, koja podrazumijeva objavljivanje javnog konkursa, formiranje komisije za utvrđivanje liste kandidata koji ispunjavaju uvjete iz stava 1. ovog člana, provođenje intervjua i druga pitanja uredit će se pravilnikom koji donosi Kantonalno ministarstvo.

Direktor ustanove imenuje se na mandat od četiri godine i može biti ponovo imenovan na još samo jedan mandat.

Član 112b.

Pored razloga propisanih Zakonom o ustanovama, upravni odbor može razriješiti direktora i prije vremena za koje je imenovan i iz slijedećih razloga:

- neispunjavanje uvjeta za imenovanje direktora ustanove propisanih ovim zakonom i pravilima ustanove,
- neusvajanje izvještaja o poslovanju koji obuhvata izvještaj o radu sa izvještajem o finansijskom poslovanju ustanove,
- zloupotrebe pozicije direktora u ustanovi u korist ličnog interesa ili interesa druge osobe,
- korištenje imovine ustanove u privatne svrhe,
- nesavjesno i neodgovorno obavljanje poslova direktora, a koje se negativno odražava na rad, afirmaciju ustanove i čuvanje njenog ugleda,
- propuštanje sprečavanja nepravilnosti u radu ustanove,
- dobijanje negativne ocijene za rad od strane upravnog odbora,
- nepoštivanje opštih akata ustanove.

Član 112 c.

Za predsjednika i člana upravnog odbora ustanove i predsjednika i člana nadzornog odbora ustanove može biti imenovana osoba koja pored opštih uvjeta propisanih Zakonom o ministarskim, vladinim i drugim imenovanjima Federacije Bosne i Hercegovine ispunjava i slijedeće uvjete:

- da je državljanin Bosne i Hercegovine,
- da nije osuđivan za krivično djelo koje je nespojivo sa obavljanjem dužnosti predsjednika i člana upravnog odbora ustanove i predsjednika i člana nadzornog odbora ustanove,
- da nije osuđivan za prekršaj koji je nespojiv sa obavljanjem dužnosti predsjednika i člana upravnog odbora ustanove i predsjednika i člana nadzornog odbora ustanove.

Bliži uvjeti za imenovanje iz stava 1. ovog člana uredit će se posebnim aktom koji donosi Vlada Kantona Sarajevo.

Član 112d.

Pored razloga propisanih Zakonom o ustanovama, Osnivač može razriješiti predsjednika i člana upravnog odbora i predsjednika i člana nadzornog odbora ustanove i prije vremena za koji je imenovan i iz slijedećih razloga:

- neispunjavanje uvjeta za imenovanje propisanih ovim zakonom i aktom iz člana 112c. stav 2. ovog zakona,
- neusvajanje izvještaja o poslovanju koji obuhvata izvještaj o radu sa izvještajem o finansijskom poslovanju ustanove,
- zloupotrebljavanje pozicije predsjednika i člana upravnog odbora i predsjednika i člana nadzornog odbora u ustanovi u korist ličnog interesa ili interesa druge osobe,
- nesavjesnog i neodgovornog obavljanja dužnosti predsjednika i člana upravnog odbora i predsjednika i člana nadzornog odbora, a koje se negativno odražava na afirmaciju ustanove i čuvanje njenog ugleda,
- propuštanje sprečavanja nepravilnosti u radu ustanove,
- nevršenje usmjeravanja i kontrole rada direktora,
- neocjenjivanje rada direktora,
- promjene broja i strukture članova upravnog odbora i članova nadzornog odbora,
- nepoštivanje i kršenje opštih akata ustanove.

Član 7.

U članu 128. stav 1. mijenja se i glasi:

„Pravo na dječiji dodatak ostvaruju porodice koje imaju prebivalište u Kantonu Sarajevo.“

Iza stava 1. dodaje se novi stav 2. koji glasi:

„Izuzetno od stava 1. ovog člana pravo na dječiji dodatak mogu ostvariti i porodice koje imaju boravište u Kantonu Sarajevo po osnovu statusa raseljenih lica i izbjeglica u Kantonu Sarajevo.“

Dosadašnji stav 2. postaje stav 3.

Član 8.

U članu 129. u stavu 1., u drugom redu, iza riječi „članu“ dodaje se riječ „zajedničkog“.

Član 9.

U članu 131. u prvom redu, riječ „djeca“ zamjenjuje se sa riječju „porodica“.

Član 10.

U članu 133. u stavu 2. u alineji 2. iza riječi privređivanje, briše se zarez i riječi: „dok ta nesposobnost traje“.

Član 11.

U članu 137. alineja 3. mijenja se i glasi:

„-nakon završene jedne školske godine upiše više od jednom istu godinu na drugoj višoj ili visokoškolskoj ustanovi.“

Član 12.

U smislu člana 112a. stava 5. ovog zakona, prvim imenovanjem direktora ustanova smatra se imenovanje nakon stupanja na snagu ovog zakona.

Kantonarno ministarstvo će donijeti pravilnike iz člana 58. stav 4. i člana 112a. ovog zakona u roku od 30 dana od dana stupanja na snagu ovog zakona.

Ustanove su obavezne uskladiti svoje opšte akte sa ovim zakonom u roku od 30 dana od dana stupanja na snagu ovog zakona.

Član 13.

Ovlašćuje se Zakonodavno-pravna komisija Skupštine Kantona Sarajevo da utvrdi prečišćeni tekst Zakona o socijalnoj zaštiti, zaštiti civilnih žrtava rata i zaštiti porodice sa djecom.

Član 14.

Ovaj zakon stupa na snagu narednog dana od dana objavljivanja u „Službenim novinama Kantona Sarajevo“.

Broj:

Sarajevo,

P R E D S J E D A V A J U Ć A
SKUPŠTINE KANTONA SARAJEVO

Prof. dr. Mirjana Malić

O B R A Z L O Ź E N J E

Zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom

I – PRAVNI OSNOV ZA DONOŠENJE ZAKONA

Pravni osnov za donošenje ovog zakona sadržan je u odredbama člana 13.e), i 18.b) Ustava Kantona Sarajevo prema kojima federalna vlast i Kanton Sarajevo imaju zajedničke nadležnosti za oblast socijalne politike, s tim da Kanton Sarajevo razrađuje institute i finansira ono što je Federalnim propisom okvirno utvrđeno.

Kanton Sarajevo ima pravo utvrđivati politiku, donositi i provoditi zakon u oblasti socijalne politike.

Osim ustavnog osnova, za donošenje ovog zakona osnov je i član 8. Zakona o osnovama socijalne zaštite, zaštite civilnih žrtava rata i zaštiti porodice sa djecom ("Službene novine Federacije BiH", br. 36/99, 54/04, 39/06 i 14/09), prema kojem nadležna tijela kantona uređuju djelatnost socijalne zaštite, zaštite civilnih žrtava rata i zaštite porodice sa djecom.

II – RAZLOZI ZA DONOŠENJE ZAKONA

Razlog za prijedlog da Skupština Kantona Sarajevo razmatra ovaj zakon po hitnom postupku nalazi se u članu 159. Poslovnika Skupštine Kantona Sarajevo („Službene novine Kantona Sarajevo“, br. 41/12- Drugi novi prečišćeni tekst) kojim je regulisano da se izuzetno po hitnom postupku može donositi samo zakon kojim se uređuju odnosi i pitanja za čije uređivanje postoji neodložna potreba i ako bi donošenje zakona u redovnom postupku moglo da izazove štetne posljedice za društveni interes u Kantonu.

Ovim zakonom propisano je, između ostalog, formiranje nove organizacione jedinice pri KJU "Disciplinski centar za maloljetnike" koja će biti nadležna za:

- obavljanje poslova vezano za zbrinjavanje djece do 18. godina starosti, koja se nalaze u riziku, a u skladu sa odlukom JU "Kantonalni centar za socijalni rad" kao organa starateljstva. Prema ovom zakonu JU "Kantonalni centar za socijalni rad" rješenjem može, radi zaštite najboljeg interesa djeteta, odlučiti o smještaju djeteta u ovu organizacionu jedinicu i bez pristanka roditelja, koje može trajati najduže dva mjeseca.

- vršenje poslova dnevnog zbrinjavanja djece na dobrovoljnoj osnovi.

Poznato je da je rad dosadašnjeg Dnevnog centra, koji je na dnevnoj osnovi zbrinjavao djecu u riziku, do sada funkcionisao po principu projekta, koji se završava 31.03.2013. godine.

S obzirom da se funkcija dosadašnjeg Dnevnog centra sistemski, pravno i finansijski rješava Prijedlogom ovog zakona ocijenjeno je da postoji neodložna potreba za donošenje istog po hitnom postupku, iz razloga kako je naprijed obrazloženo.

Nadalje, Prijedlogom Zakona regulisani i uvjeti za imenovanje i razrješenje direktora, predsjednika i članova upravnog odbora, predsjednika i članova nadzornog odbor, to se isto moralo navesti u osnovnim odredbama.

Prijedlogom Zakona je predviđeno proširenje kruga osoba koje se nalaze u stanju socijalne potrebe kojima će se prema finansijskim mogućnostima Budžeta Kantona Sarajevo i raspoloživim stambenim jedinicama, osigurati stambeno zbrinjavanje, s tim da će Vlada Kantona Sarajevo donijeti propis kojim će se preciznije regulisati ko se smatra osobom u stanju socijalne potrebe, način i kriteriji po kojima se ovo pravo može ostvariti.

Predviđeno je i da će Ministarstvo donijeti pravilnik kojim će se urediti kriteriji za utvrđivanje visine učešća srodnika u troškovima smještaja u ustanovi, a razlog je da se olakša utvrđivanje visine novčanih iznosa sa kojima će srodnici lica smještenih u ustanove socijalne zaštite učestvovati u smještaju.

Iz razloga preciziranja postupanja KJU „Disciplinski centar za maloljetnike“ po naredbama suda koje se temelje na primjeni čl. 378. i 387. Zakona o krivičnom postupku Federacije Bosne i Hercegovine, Ministarstvo je stava da se ranije uspostavljena praksa zbrinjavanja ove kategorije maloljetnika precizno utvrdi ovim zakonom čime se otklanjaju eventualne dileme po ovom pitanju.

Iz razloga što je navedenim članovima Zakona o krivičnom postupku Federacije Bosne i Hercegovine utvrđeno da troškovi smještaja za ove kategorije maloljetnika padaju na teret sudskog postupka, te da je Vlada Kantona Sarajevo već utvrdila cijenu takvog smještaja u ustanovi, predloženo rješenje neće zahtijevati dodatne finansijske troškove.

U cilju stvaranja pretpostavki za sistemsko rješavanje problema zbrinjavanja djece u riziku (prosjachenje, skitnja, zlostavljanje, nedozvoljena trgovina i zloupotreba djece, odgojno zanemarivanje, asocijalno ponašanje i sl.), ovo ministarstvo je stava da se u okviru KJU „Disciplinski centar za maloljetnike“ formira posebna organizaciona jedinica dislocirana od korisnika ustanove upućenih putem suda, u kojoj bi se ovoj kategoriji djece pružila neophodna briga, pomoć i zaštita na dnevnoj i stacionarnoj osnovi.

Ovakav način zbrinjavanja rizičnih kategorija djece, pored pružanja brige pomoći i zaštite zasigurno omogućava i prevenciju asocijalnih i delinkventnih ponašanja djece i maloljetnika.

Nakon sticanja neophodnih uvjeta ova organizaciona jedinica bi prerasla u ustanovu socijalne zaštite.

U novom podnaslovu, regulisani su uvjeti za imenovanje i razrješenje direktora ustanova socijalne zaštite, predsjednika i članova upravnog odbora, predsjednika i članova nadzornog odbora. Za ovo je postojala potreba, kako bi se pored odredaba Zakona o ustanovama koje regulišu ovu materiju, ovim zakonom, aktom Vlade Kantona Sarajevo i pravilnikom ovog ministarstva precizirali i dodatni uvjeti za imenovanje direktora ustanova socijalne zaštite, predsjednika i članova upravnog odbora, predsjednika i članova nadzornog odbora i uvjeti za njihovo razrješenje.

U dijelu Zakona koji reguliše zaštitu porodice sa djecom, došlo je do izmjena koje se tiču boravišta korisnika ovog prava, jer je uočeno da jedan broj ovih korisnika ostvaruje pravo na dječiji dodatak fiktivno prijavljujući boravište u Kantonu Sarajevo isključivo radi ostvarivanja prava na dječiji dodatak. Stoga je postojala potreba da se Zakon u ovom dijelu izmijeni, na način da pravo na dječiji dodatak mogu ostvariti osobe koje pored prebivališta imaju i boravište, uz uslov da imaju status raseljene osobe i izbjeglice u Kantonu Sarajevo. Takođe je postojala je potreba da se otklone neke dileme u primjeni Zakona koje su imali prvostepeni organi u pogledu domaćinstva, dobne granice ostvarivanja prava na dječiji dodatak djece koja su nesposobna za privređivanje, te u pogledu prestanka prava na dječiji dodatak u slučajevima prebacivanja djeteta u toku studija sa jedne na drugu višu ili visokoškolsku ustanovu.

III – OBRAZLOŽENJE PREDLOŽENIH PRAVNIH RJEŠENJA

Član 1.

Ovim članom utvrđeno je da se Zakonom o socijalnoj zaštiti, zaštiti civilnih žrtava rata i zaštite porodice sa djecom regulišu i uvjeti za imenovanje i razrješenje direktora, predsjednika i članova upravnog odbora, predsjednika i članova nadzornog odbora.

Član 2.

Ovim članom je definisano da osobe koje su u stanju socijalne potrebe imaju pravo na osiguranje stambenog zbrinjavanja u skladu sa finansijskim mogućnostima u Budžetu Kantona Sarajevo i raspoloživim stambenim jedinicama. Takođe je regulisano da će Vlada Kantona Sarajevo svojim propisom utvrditi ko se smatra osobom i porodicom u stanju socijalne potrebe i način i kriteriji po kojima se ostvaruje ovo pravo.

Član 3.

Ovim članom regulisano je da će Ministarstvo za rad, socijalnu politiku, raseljena lica i izbjeglice donijeti pravilnik kojim će se regulisati kriteriji o učešću srodnika u troškovima smještaja u ustanovu socijalne zaštite.

Član 4.

Ovim članom brisani su st. 3., 4. i 5. iz clana 86. Zakona, a razlog je definisanje iste materije u podnaslovu 12. ovog zakona.

Član 5.

Ovim članom izmijenjen je član 98a. Zakona na sljedeći način:

Utvrđeno je da KJU „Disciplinski centar za maloljetnike“ može provoditi odluku o privremenom smještaju maloljetnika u toku postupka,

Definisano je i da će se u u posebnoj izdvojenoj organizacionoj jedinici koja se nalazi u okviru KJU „Disciplinski centar za maloljetnike“, zbrinjavati djeca koja se nalaze u riziku, s tim da ova organizaciona jedinica treba da postane ustanova kada se za to steknu materijalni uvjeti.

Takođe je utvrđeno da organ starateljstva radi zaštite najboljeg interesa djeteta, može rješenjem odlučiti o smještaju djeteta u novu organizacionu jedinicu KJU „Disciplinski centar za maloljetnike“, koje može trajati najduže dva mjeseca. O žalbi na ovo rješenje odlučuje Ministarstvo za rad, socijalnu politiku, raseljena lica i izbjeglice, a žalba ne odlaže izvršenje.

Član 6.

Ovim članom dodaje se u Zakon novo poglavlje 12. Uvjeti za imenovanje i razrješenje direktora, predsjednika i članova upravnog odbora, predsjednika i članova nadzornog odbora u ustanovama socijalne zaštite i čl. 112a., 112b., 112c. i 112d. koji se odnose na propisivanje uvjeta za imenovanje direktora ustanova socijalne zaštite, predsjednika i članova upravnog odbora, predsjednika i članova nadzornog odbor i razlozi za njihovo razrješenje. Pored ovih utvrđenih uvjeta, utvrđeno je i da se direktor imenuje na mandat od četiri godine, s tim da može biti imenovan na još samo jedan mandat.

Predviđeno je i da direktor ustanove socijalne zaštite ne može biti predsjednik i član upravnog odbora, te predsjednik i član nadzornog odbora bilo koje ustanove koja djeluje u Bosni i Hercegovini

Pravilima ustanove bliže će se urediti bliži uvjeti za imenovanje direktora, a vezano za stručnu spremu i eventualno druge uvjete za koje se procijeni da su od značaja za vršenje poslova direktora.

Proceduru izbora i imenovanja direktora i druga pitanja uredit će se pravilnikom koji će donijeti ovo ministarstvo.

Bliže uvjete za imenovanje predsjednika i članova upravnog odbora, predsjednika i članova nadzornog odbora u ustanovama socijalne zaštite urediće Vlada Kantona Sarajevo.

Član 7.

U ovom članu je utvrđeno da pravo na dječiji dodatak mogu ostvariti osobe koje imaju prebivalište u Kantonu Sarajevu, sa izuzetkom da ovo pravo mogu ostvariti i osobe koje imaju boravište u Kantonu Sarajevo uz uslov da imaju status raseljenih osoba i izbjeglica u Kantonu Sarajevo.

Član 8.

U ovom članu ispred riječi domaćinstva dodaje se riječ zajedničkog, radi preciznog utvrđivanja da se radi o zajedničkom domaćinstvu.

Član 9.

Ovim članom riječ „djeca“ zamijenjena je riječju „porodica“, a razlog je tehničke prirode.

Član 10.

U ovom članu brisane su riječi „dok ta nesposobnost traje“, kako bi se otklonile dileme u pogledu dobne granice ostvarivanja prava na dječiji dodatak djece nesposobne za privređivanje koji ovo pravo ostvaruju najdalje do 27. godine života.

Član 11.

U ovom članu izmijenjena je alineja 3., te se reguliše da djeca koja nakon završene jedne školske godine upišu više od jednom istu godinu na drugoj višoj ili visokoškolskoj ustanovi, gube pravo na dječiji dodatak.

Član 12.

U ovom članu regulisano je da se prvo imenovanje direktora smatra ono imenovanje nakon što stupi na snagu ovaj zakon, te rokovi za izradu pravilnika ministarstva i usklađivanje opštih akata ustanova sa ovim zakonom.

Član 13.

Ovim članom je regulisano da će Zakonodavno-pravna komisija Skupštine Kantona Sarajevo utvrditi prečišćeni tekst Zakona o socijalnoj zaštiti, zaštiti civilnih žrtava rata i zaštiti porodice sa djecom.

Član 14.

Ovim članom je utvrđen dan stupanja na snagu ovog zakona.

IV – FINANSIJSKI OKVIR ZAKONA

Obrazloženje o sredstvima iz Budžeta Kantona Sarajevo za 2013. godine, za funkcionisanje nove organizacione jedinice KJU „Disciplinski centar za maloljetnike“ u okviru potrošačke jedinice KJU „Disciplinski centar za maloljetnike“, koja je u nadležnosti Ministarstva za rad, socijalnu politiku, raseljena lica i izbjeglice Kantona Sarajevo

Za rad nove organizacione jedinice u okviru KJU „Disciplinski centar za maloljetnike, obezbjeđena su novčana sredstva u iznosu od 241.800.00 za period od 01.04.-31.12.2013. godine.